



‘Alamā 32–35

13–19 SIULAI




Hili hono fakafehoa-naki ‘e ‘Alamā e folofola ‘a e ‘Otuá ki ha tenga‘i ‘akau (vakai, ‘Alamā 32:28–43), na‘e fehu‘i ange ‘e he kakaí e founga ke tō ai e tengá. Na‘e faka‘aonga‘i ‘e ‘Alamā e fakamatala kia Mōsese mo e ngata palasá mei he Nōmipa vahe 21 ko ha fakatātā ‘o e ngāue ‘i he tuí (vakai, ‘Alamā 33:19–23).

FEALĒLEA‘AKÍ

Na‘e fie ma‘u pē e kakai ‘Isilelí ke nau sio kae fakamo‘ui kinautolu. Ko e hā ha ngaahi tefito‘i mo‘oni ‘e ni‘ihi ‘o e ongoongoleléi ‘oku ngali faingofua hangē ko e “sio”? Ko e hā ha tō‘onga fakakaukau pe ‘ulungaanga ‘okú ne fa‘a tāofi ai kitautolu mei hono mo‘ui ‘aki e ngaahi tefito‘i mo‘oni faingofua ‘o e ongoongoleléi?

Te ke lava fēfē ‘o sio ki he Fakamo‘uí ‘i he ngaahi me‘a ‘okú ke a‘usia ‘i he ‘aho takitaha?

Ko e hā ‘Oku Vahevahe ai ‘e ‘Alamā e Talanoa kia Mōsese mo e Ngata Palasá?



Ko ha Fakataipe ‘o Kalaisi

Ko e *fakataipe* ‘o ko ha me‘a ia ‘okú ne fakafongā‘i pe hoko ko e fakamelomelo ‘o ha me‘a pe tokotaha. ‘I he taimi na‘e huhu ai e kau ‘Isilelí ‘e he fanga ngata huhu koná, na‘e hiki hake ‘e Mōsese e ngata palasá, ‘a ia na‘e hoko ko ha fakataipe ‘o Kalaisi. Na‘e fakamo‘ui ‘a kinautolu kotoa pē na‘e ngāue ‘i he tuí ‘o sio ki aí, ‘o hangē pē ko e fakamo‘ui fakalaumālie ‘a kinautolu ‘oku ngāue‘i ‘enau tui kia Sīsū Kalaisí.

Na‘e Fakafefeka ‘e ha Ni‘ihi Honau Lotó

Neongo ‘ene ngali faingofua ke sió, ka na‘e fakafefeka ‘e ha kakai ‘e ni‘ihi honau lotó pea ‘ikai ke nau fie sio, pea na‘a nau mate ‘i hono huhu kinautolú. Ko e hā na‘e ‘ikai ke nau sio aí? (vakai, ‘Alamā 33:20). Ko e hā ‘e lava ke ako‘i mai ‘e he me‘a ni fekau‘aki mo e tuí mo e ta‘etuí?

‘E Fakamo‘ui Nai Koe?

Kapau ‘e lava ‘o fakamo‘ui koe ‘i hono fai ha me‘a faingofua ko e sio pē, te ke fai nai ia? Na‘e fai ‘e ‘Alamā e fehu‘i ni mo fakafe‘i kitautolu ke sio ki he Fakamo‘uí ‘aki ‘etau tui kiate Iá (vakai, ‘Alamā 33:21–22).